

Belen Kock-Marchena cu presentacion y bautismo di coleccion nobo di poesia y disco compacto



ORANJESTAD (AAN) -- E conocido poeta Belen Kock-Marchena ta bay publica un coleccion nobo di poesia yama "Den bena di bida/Levensader", y ademas e lo bin cu algo unico cu ta un disco compacto di su poemanan saca for di su tres coleccionnan di poesia: Vibracion di Amor (1995), Milager-Miracle (1998) y Den bena di bida/Levensader (2001).

E presentacion y bautismo di e buki y e CD titula "Alimento pa Alma", lo tuma lugar diaranzon 11 di Juli proximo, den Cas di Cultura, pa 8'or di anochi.

DIARIO a entrevista sra. Kock-Marchena, encuanto su trabao nobo aki.

"DEN BENA DI BIDA/LEVENSADER"

"A tuma mi tres aña pa mi por a traha riba e coleccion nobo aki. Den bena di bida ta un coleccion di 23 poema na Papiamentu y e mesun poemanan aki a worde traduci na Hulandes.

Den bena di bida nos ta worde enfrenta, por ehemplo, cu e lucha pa nos Papiamentu y naturalmente bo ta worde inspira pa skirbi tocante e desaroyo di nos dushi Idioma.

Tambe den "bena di bida" nos por topa e situacion unda un yiu ta bira mama y tata di su mama. Un situacion asina ta haci hopi impacto riba bo cu bo ta yega na skirbi un poema tocante di e tema aki.

E poemanan aki ta di caracter cultural pero mas tanto di caracter social. Mi responsabilidad pa loke ta pasa den mi comunidad. Por ehemplo, loke ta preocupa nos tur ta e adiccion, sea den droga, sea den alcohol, y mi a yega di scucha un adicto duna su testimonio diferente biaha y el a haci asina hopi impacto riba mi, cu mi a hinca mi mes den e adicto y mi a skirbi e dolor di un adicto.

Aruba por ehemplo, ta un pais multinacional. Nos ta topa hende di tur pais, nos tin hopi biaha e tendencia di discrimina otro, di rechaza otro, y esaki tambe ta algo cu ta preocupa mi y mi a skirbi algo riba e tema aki.

Tambe como maestro di school tur aña di nobo bo ta haya bo enfrenta cu un cantidad di muchanan di famianan kibra, cu ta bin cu tur nan dolor y carga school.

E situacionnan aki den mi klas ta haci hopi impacto riba mi tur biaha atrobe y ta nace diferente inspiracion. Mi tin diferente poema skirbi riba esey.

Y asina por sigui menciona tur e temanan di e coleccion di poesia "den bena di bida", pero ta mehor pa lectornan lesa e buki pa comparti e sentimentonan aki", Belen Kock-Marchena a splica.

E autor a laga traduci e buki aki na Hulandes, door di su amiga Ria Petronia-Heesakkers pasobra cu na schoolnan secundario su poemanan ta worde usa riba lista di literatura, y tambe e por alcanza un publico mas amplio.

PORTADA Y ILUSTRACION:

E portada ta un diseño di su propio yiu Raffy Kock, cu ta estudiante Ingenieria Civil na Hulanda.

"E portada tin un nificacion hopi profundo. Den e portada bo por mira un curazon pero tambe bo por mira e halanan di un paloma di paz. Den e curazon dos hende ta dunando luz na otro. E mensahe pa mi ta cu den bida nos mester ta hendenan amoroso cu kier brinda paz y amor.

E ilustracionnan den e buki ta di e gran escritor y pintor Antiyano Elis Juliana.

Elis Juliana a bisa mi cu no ta e intencion pa e pinta loke e poema ta bise, pasobra e ta haya nan mucho profundo. Ta pesey,

el a regala mi siete di su pinturanan precioso y cada hende por saca pa nan mes afo kico e pintura ta nifica pa nan".

"ALIMENTO PA ALMA"

"Hopi tempo caba mi a worde acerca pa mi por declama mi propio poemanan riba un CD. E motor tras di e proyecto aki indudablemente ta Tino Ruiz. Pa medio di yudanza di F.C.C.A por fin e soño di mi lo bay bira realidad.

E ta un proyecto hopi grandi y nos a traha na dje cu hopi dedicacion. E musiconan cu a duna aporte na e obra aki ta Padu Lampe, Delbert Bernabela, Lydia Emerencia, Edwin Kock, Tino Ruiz, y Franklin Granadillo.

Mi ta spera cu pa comienzo di Juli e CDnan ta na Aruba. E bautismo di e CD tambe ta tuma lugar e mesun dia cu e bautismo di e coleccion di poesia.

Mi a scoge algun poema di tur mi tres coleccionnan di poesia. Padu Lampe a compone un melodia pa un di mi poemanan y Lydia Emerencia a cante.

Lydia Emerencia tambe a compone dos melodia di mi poemanan y esaki tambe el a graba riba e CD. Kiermen cu e CD tin variacion. Ademas mi a declama seis di mi poemanan na Ingles y seis na Hulandes.

E portada y e buki di e CD ta diseño di nos yiu Raffy y e potret ta mi casa Dolfi mes a saque. Asina aki nos por mira cu e proyecto aki ta un proyecto di famia", Belen Kock-Marchena a duna di conoce.

E autor ta spera cu pueblo di Aruba lo duna e trabao nobo aki e mesun bon acogida cu el a ricibi di su prome y di dos coleccion.